

Սիրելի հայրենակիցներ,

Վստահաբար այս ծանր տնտեսական պայմաններուն տակ, ինձմէ կը սպասէք լաւատեսութիւն ներշնչող մի քանի խօսքեր կամ մօտ ապագային աւելի լաւ ըլլալու հաւանականութիւն, սակայն իրականութիւնը դժբախտաբար այդպէս չէ, սիրելիներ: Մեր դիմաց ունինք բաւական դժուար տարիներ, որ պէտք է դիմագրաւենք մեծ համբերութեամբ, գիտակցութեամբ եւ ամենակարելորդ՝ առանց յուսահատելու:

Կիպրոսի ժողովուրդը այս օրերուս շատ սուղ գին կը վճարէ վերականգնելու համար իր երբեմնի բարօր կեանքը: Երկար տարիներու անփութութեան պատճառով, մեր չքնաղ կղզին հասաւ անդունդի եզրին: Անգործութեան թիւը այս ամիս հասաւ եօթանասունհինգ հազարի: Սակայն, կը հաւատամ թէ միասնաբար, ձեռք ձեռքի տալով ու աւելի առողջ եւ դրական մօտեցում ցուցաբերելով, պիտի կարենանք յաղթահարել այս ծանրակշիռ տարիները:

Գալով մեր գրասենեակի եւ Կիպրահայ գաղութի ներքին ու ազգային կեանքին, հակառակ երկրին տնտեսական իրավիճակին, ծրագրուած ձեռնարկներու եւ միջոցառումներու հոլովոյթը շարունակուեցաւ սովորական ձեւով: Այս եռամսեան եղաւ բաւական բեղուն ու արդիւնաւէտ, մեզմէ խլելով երկար ժամերու աշխատանք: «Լրատու»ի յաջորդող էջերուն մէջ անդրադարձած ենք անոնց մասին:

Յուլիս 14-27, Նարեկ Վարժարանի շրջանաւարտները ընկերակցութեամբ երկու ուսուցչուհիներու, պիտի մեկնին

Հայաստան: Անոնց կը մաղթեմ բարի վայելում, անմոռանալի շրջապատոյտ, ինչպէս նաեւ՝ ապահով վերադարձ:

Ինչ կը վերաբերի «ՆԱՆՕՐ» Հայկական Մանկական Կեդրոնին, արդէն տեղեակ էք, 2 Սեպտեմբեր 2013-ին, մանկամտուրը օրինաւոր կերպով պիտի սկսի գործել, մեր երեխաները ընդունելով ապահով միջավայրի մէջ: Տեղին է յիշել, թէ ամսական վճարումները ներկայ պայմաններուն տակ, խղճմտօրէն ուսումնասիրուած ու սերտուած են եւ բաղդատմամբ պետական ու անձնական մանկամտուրներուն, բաւական ձեռնտու են չծանրաբեռնելու համար ծնողները:

Այս բոլորին կողքին, Երեսփոխանական Գրասենեակը իր տարեկան Կիպրոս-Հայաստան մշակութային յարաբերութեան ծիրէն ներս, ծրագրած է Հայրենի «ժողովրդական Երգիչ» նախագիծի ամենալաւագոյն երգիչ-երգչուհիները հրաւիրել Կիպրոս, միայն մէկ ելոյթ ունենալու համար, որ տեղի պիտի ունենայ Շաբաթ, 9 Նոյեմբեր 2013-ին, Ստրովոլոսի Քաղաքապետարանի սրահին մէջ, երեկոյեան ժամը 19:00-ին: Յոյսով ենք, որ գոնէ մէկ գիշերուայ համար, պիտի կարողանանք ձեզի պարզելու հաճելի պահեր մոռնալու ձեր առօրեայ հոգերն ու դժուարութիւնները:

Խօսքիս աւարտին, բոլորիդ կը մաղթեմ հանդարտ ու կազդուրիչ ամառնային արձակուրդ:

Վարդէս Մահտեսեան

Կիպրահայ Համայնքի Պետական Ներկայացուցիչ

ԵՌԱՄՍԵԱՅ ԳՈՐԾՈՒՆԵՌՈՒԹԻՒՆ

Վերջին մի քանի ամիսներուն երկրէն ներս տիրող տրնտեսական ճգնաժամին հետեւանքով, Կիպրոս բնակութիւն հաստատած մեր հայրենակիցներուն կեցութեան հարցերը խիստ բարդացած են: Աշխատանքային Բաժանմունքին կողմէ օտարահպատակներու աշխատանքի հրամաններու սահմանափակումներ առաջադրուած են, իսկ Ներքին Գործոց Նախարարութեան կողմէ տրուած արտօնութիւնները զգալիօրէն պակսած են, Կիպրոսէն ներս անգործութեան համեմատութիւնը նուազեցնելու նպատակով:

Յոս յիշենք, թէ վերջերս տեղի ունեցաւ նաեւ սակերու անհամեմատելի փոփոխութիւն, ինչ կը վերաբերի Ներքին Գործոց Նախարարութեան Օտարահպատակներու եւ Ներգաղթի Բաժանմունքի զանազան դիմումներու ձեւերուն, քաղաքացիութեան դիմումներուն, ինչպէս նաեւ Նահանգային Գրասենեակի տարբեր տեսակի փաստաթուղթեր ապահովելու կապակցութեամբ:

Ապրիլեան Եղեռնի 98-րդ տարելիցի ոգեկոչման ձեռնարկներ

Հինգշաբթի, 18 Ապրիլին, Կիպրահայ Յամայնքի Պետական Ներկայացուցիչ Պրն. Վարդէս Մահտեսեան, Ապրիլեան Եղեռնի 98-րդ տարելիցի ոգեկոչման առիթով, ելոյթ ունեցաւ Կիպրոսի Խորհրդարանէն ներս, ներկայութեամբ խորհրդարանի բոլոր անդամներուն:

Պրն. Մահտեսեանի ելոյթէն ետք, խորհրդարանի անդամները մէկ վայրկեան յոտնկայս լռութեամբ յարգեցին Հայոց Ցեղասպանութեան 1.5 միլիոն անմեղ նահատակներու յիշատակը:



Կազմակերպութեամբ Հայկական Տեղասպանութեան Կիպրոսի Ոգեկոչման Յանձնախումբին, Ապրիլեան ձեռնարկներու մեկնակէտը սկսաւ Շաբաթ, 20 Ապրիլ 2013-ին, շուրջ 30 անհատներու արիւնի տուչութեամբ, Նիկոսիոյ

Նարեկ Վարժարանին մէջ:

Չորեքշաբթի, 24 Ապրիլ 2013-ին առաւօտեան, Ս. Աստուածածին եկեղեցւոյ մէջ տեղի ունեցաւ Ս. Պատարագ եւ Հոգեհանգստեան արարողութիւն՝ ի յիշատակ 1.5 միլիոն նահատակներուն:

Նոյն օրը, Չորեքշաբթի, 24 Ապրիլ 2013-ին, կ.ե. ժամը 6:00-ին, Նիկոսիոյ քաղաքի Մակարիոս պողոտայէն սկիզբ առաւ երիտասարդութեան քայլարշաւը ուղղուելով դէպի Արմենիաս եւ Լիմասոլ պողոտաներու խաչմերուկ, ուր անոնց միացան համայնքի մնացեալ անդամները, յառաջանալով դէպի Ս. Աստուածածին եկեղեցւոյ շրջափակը: Եղեռնի Նահատակներու Յուշահամալիրին առջեւ, երեկոյեան ժամը 7:30-ին, տեղի ունեցաւ հոգեհանգստեան արարողութիւն գլխաւորութեամբ թեմիս Կաթողիկոսական Փոխանորդ Գերաշնորհ Տ. Վարուժան Արքեպիսկոպոս Հերկելեանի: Հսկումի միջոցառումը կը վայելէր Ստրովլոլոսի քաղաքապետ Դոկտ. Լազարոս Սավիտիսի հովանաւորութիւնը:



Կաթողիկոսական Փոխանորդ Գերաշնորհ Տ. Վարուժան Արք. իր պատգամին մեջ ընդգծեց, թե Հայաստանի Հանրապետությունն ու Սփիւռքը պետք է համախմբեն իրենց ուժերը եւ միասնաբար աշխատանք տանին աշխարհին յիշեցնելու Հայկական Ցեղասպանությունը՝ պահանջելով արդարություն, ապա պետք է լուսաբանեն թուրք ժողովուրդը Ցեղասպանութեան իրականութեան մասին: Անշարունակեց ըսելով, թե արդարութեան հաստատումը աշխարհի բոլոր ժողովուրդներուն պարտականությունն է, որպէսզի կանխարգիլուին նորանոր ցեղասպանություններու գործադրումը:

Կիպրահայ Համայնքի Պետական Ներկայացուցիչ Պրն. Վարդգէս Մահտեսեան խօսք առնելով իր պատգամին մեջ շեշտեց, թե մեր պահանջքը արդար հատուցում է եւ ո՛չ թէ վրէժխնդրություն: Անըսաւ, թե ոչինչ կրնայ քողարկուիլ արեւու լոյսին տակ, սակայն արդարութեան արեւը տակաւին քիչ մը ժամանակի կը կարօտի լրիւ փայլելու համար: Կիպրոսը աշխարհի երկրորդ եւ Եւրոպական առաջին երկիրը հանդիսացաւ 1975-ին ճանչնալով Հայկական Ցեղասպանությունը: Մօտաւորապէս 100 երկար տարիներ անցած են Հայկական Ցեղասպանութենէն եւ Հայ ժողովուրդը դիմագրաւած է ահաւոր դժուարութիւններ: Հակառակ մեծ պետութիւններու շահերուն, որոնք ընդհանրապէս ի նպաստ թուրքիոյ եղած են, կը սպասենք Միացեալ



Նահանգներու նախագահէն, որ պարտադրէ թուրքիոյ ներողութիւն խնդրել Յայ ու Կիպրացի ժողովուրդներէն:

Վերջաւորութեան, Պետական Ներկայացուցիչը իր խօսքը եզրափակեց ըսելով, թէ Յայկական Ցեղասպանութեան ոգեկոչման առիթով, Կիպրոսի ժողովուրդին ապագայի լաւատեսութեան կոչ կ'ուղղէ: Յայ ժողովուրդի պատմութենէն դասեր քաղելով եւ մղած երկարատեւ պայքարը օրինակ ունենալով, Կիպրոսի ժողովուրդը պէտք է յամառ աշխատանքով առաջ ընթանայ գլուխները բարձր պահած, որպէսզի կարողանայ դուրս գալ այս չափազանց դժուար տնտեսական ճգնաժամէն:

Օրուայ ողջոյնի խօսքով ելոյթ ունեցաւ Ստրովոլոսի քաղաքապետ Դոկտ. Լազարոս Սավիտիս յայտնելով, թէ մեծ ուրախութեամբ, յատուկ յարգանքով եւ միեւնոյն ժամանակ խոր զգացմունքներով ներկայ կը գտնուի Յայկական Ցեղասպանութեան 98-րդ տարելիցի ոգեկոչման հանդիսութեան տալով իր հովանաւորութիւնը: Ան հակիրճ ձեւով ներկայացուց Յայ ժողովուրդի պատմականը, սկսեալ 1894 թուականի Սասունի եւ Մուշի Համիտեան սպանդներէն, հասնելով մինչեւ 1915-1923-ի Յայկական Ցեղասպանութիւնը ու Յայ ժողովուրդի զանգուածային գաղթը դէպի օտար երկիրներ՝ ներառեալ Կիպրոս: Շարունակելով իր խօսքը, ան նմանութիւն մը գտաւ Յայ եւ Կիպրացի ժողովուրդներուն դիմագրաւած պատմական անարդարութեան մէջ, պահանջելով մեծ պետութիւններէն պարտադրել թուրքիոյ ընդունելու իր գործած ոճիրները: Յայոց Ցեղասպանութեան ճանաչումը՝ հիմնաքարը պիտի հանդիսանայ թուրքիոյ արդիականացման, որ կը փափաքի ընդգրկուիլ Եւրոպական Միութեան մեծ ընտանիքին մէջ:

Եզրափակելով ողջոյնի խօսքը, Դոկտ. Լազարոս Սավիտիս իր յարգանքը արտայայտեց՝ ի յիշատակ նահատակ-

լած հայ քոյրերուն եւ եղբայրներուն, ինչպէս նաեւ իր մեծ հիացմունքը Կիպրահայ ու ընդհանրապէս Հայ ժողովուրդին հանդէպ, որոնք յարատեւ Կիպրոսի կողքին եղած են եւ կարողացած են վերականգնել իրենց հայրենիքը եւ արժանապատուութիւնը:

Հսկունի վերջաւորութեան ելոյթ ունեցաւ Ս. Աստուածածին եկեղեցւոյ երգչախումբը, որմէ ետք տեղի ունեցաւ ծաղկեպսակներու զետեղում՝ ձեռամբ կուսակցապետերու ներկայացուցիչներուն, երեսփոխաններուն, դեսպաններուն եւ այլ բարձրաստիճան պաշտօնակատարներուն:

«ՆԱՆՕՐ» կրտսեր պարախումբի բացառիկ ելոյթ



Շաբաթ, 11 Մայիս 2013-ին, Ստրովոլոսի Քաղաքապետարանի սրահին մէջ, մեծ յաջողութեամբ տեղի ունեցաւ Համազգայինի «Սիփան» պարախումբի տարեկան ելոյթը, որու ընթացքին 55 անդամ հաշուող «Նանօր» կրտսերներու պարախումբը, մեծ բաժին ունենալով, տպաւորեց ու հմայեց հայ եւ օտար հասարակութիւնը: Անթերի կատարումով, երկարաժամ փորձերէ ետք, պարուսոյց Պրն. Պետրոս Ղարիպեանի գլխաւորութեամբ, «Նանօր» կըրտսերներու պարախումբը եկաւ փաստելու, թէ միասնական

կամքով ու լուրջ մտեցումով կարելի է հասնիլ բարձր արդյունքներու: Ելոյթէն ետք, պետական բարձրաստիճան հրաւիրեալներն ու դեսպանները ջերմօրէն շնորհաւորեցին Պետական Ներկայացուցիչը իր նախաձեռնութեան համար:

Ուխտագնացութիւն դէպի Մակարայ վանք



Կազմակերպութեամբ Կիպրահայ Համայնքի Պետական Ներկայացուցիչ Պրն. Վարդգէս Մահտեսեանի եւ գործակցութեամբ Ազգային Առաջնորդարանի, վեցերորդ անգամ ըլլալով, Կիրակի, 19 Մայիս 2013-ին մեծ յաջողութեամբ իրականացաւ դէպի Սուրբ Մակարայ վանք ուխտագնացութիւնը, մասնակցութեամբ շուրջ 150 Կիպրահայերու եւ դուրսէն ժամանած հայրենակիցներու:

Ուխտագնացութիւնը, ինչպէս միշտ, կը վայելէր Կիպրո-

սի Միացեալ Ազգերու Կազմակերպութեան (UNFICYP) հսկողութիւնը:

Ս. Մակարայ վանքի քարուքանդ ու անմխիթար խորանին դիմաց տեղի ունեցաւ պատշաճ եկեղեցական արարողութիւն Տ. Վարուժան Արքեպիսկոպոսի եւ Տէր Մոմիկ Քահանայի մասնակցութեամբ, որոնք ընթացքին ուխտագնացները նորոգեցին իրենց ուխտը եւ հաստատականութիւնը՝ կառչած մնալու հայապատկան մեր վանքին:

Վերադարձին, անոնք հոգեպէս գոհացած, շնորհակալութիւն յայտնեցին Պետական Ներկայացուցիչին, բժախնդրօրէն կազմակերպած ըլլալուն համար այս ուխտագնացութիւնը:

«ՆԱՆՕՐ» Հայկական Մանկական Կեդրոն

Արդէն իսկ տեղեակ էք, թէ Երկուշաբթի, 2 Սեպտեմբեր 2013-ին, առաջին անգամ ըլլալով օրինաւոր կերպով պիտի սկսի գործել «ՆԱՆՕՐ» Հայկական Մանկական Կեդրոնը, Նիկոսիոյ Նարեկ Վարժարանի կառոյցէն ներս: Շուրջ տարի մը տեւած շինարարական, ներքին կահաւորման եւ վարչական աշխատանքները աւարտած ըլլալով, այս անհրաժեշտ հաստատութեան ստեղծումը, վերջապէս իրականութիւն կը դառնայ Կիպրահայ գաղութի կեանքէն ներս: Դրութիւն մը, ձեռնտու թէ ծնողներուն եւ թէ՛ փոքրիկներուն, որ անկասկած պիտի նպաստէ նաեւ մեր գաղութի հայապահպանման նպատակին:

Տեղին է յիշել, թէ Կեդրոնը ոչ հասութաբեր հաստատութիւն մըն է եւ պիտի կառավարուի հինգ հոգիէ բաղկացած ու նշանակուած Վարչական Խորհուրդին կողմէ:

Նարեկ Հայկական Վարժարաններու կեանքէն

Չորեքշաբթի, 29 Մայիս 2013-ին, տեղի ունեցաւ Նարեկ վարժարաններու տարեկան մարզահանդէսը, հովանաւո-

րուքեամբ Տէր Վարուժան Արքեպիսկոպոս Յերկելեանի եւ նախագահութեամբ Պետական Ներկայացուցիչի: Ձեռնարկի աւարտին, Պրն. Մահտեսեան կատարեց մետալներու յանձնում առաջնակարգ դիրքերը գրաւող բոլոր աշակերտներուն:



Չորեքշաբթի, 19 Յունիս 2013-ին, տեղի ունեցաւ Նարեկ Վարժարաններու Նախակրթարանի եւ Միջնակարգի ամալերջի հանդէսը, հովանաւորութեամբ Կաթողիկոսական Փոխանորդ Տ. Վարուժան Արքեպիսկոպոսի եւ նախագահութեամբ Պրն. Վարդգէս Մահտեսեանի: Հանդէսի վերջաւորութեան, Վարուժան Արքեպիսկոպոս Յերկելեան եւ Պրն. Մահտեսեան կատարեցին վկայականներու բաշխում, իսկ Պրն. Մահտեսեան շրջանաւարտներուն եւ ընկերակցող ուսուցիչներուն յանձնեց աւանդութիւն դարձած իր նուէրը՝ Հայաստան շրջապտոյտի պահարանները:

Յաջորդ օրը, Հինգշաբթի, 20 Յունիս 2013-ին, ըստ աւանդութեան Նարեկի շրջանաւարտները, տնօրէնութիւնն



ու ուսուցչական կազմը, ինչպես նաև կղզիի բոլոր հայ շրջանաւարտները, ներկայութեամբ Վարուժան Արքեպիսկոպոսի եւ Տէր Մոմիկ Քահանայի, հիւրասիրուեցան Տէր եւ Տիկին Վարդգէ Մահտեսեաններու բնակարանը:

Ձեռնարկներու ներկայութիւն

Հինգշաբթի, 4 Ապրիլ եւ Շաբաթ, 6 Ապրիլ 2013-ի երեկոյեան, Տէր եւ Տիկին Վարդգէ Մահտեսեաններ յատկապէս հրաւիրուելով, ներկայ գտնուեցան Լիմասոլի Monte Caputo շքեղ հանդիսասրահին մէջ տեղի ունեցած Rotarian District 2450 Խորհրդաժողովի բացման եւ փակման արարողութեան, որուն Կառավարիչն է Պրն. Գէորգ Մահտեսեան: Նշենք, որ այս զոյգ արարողութիւններուն քանի մը պարերով իր մասնակցութիւնը բերաւ Համագ-գայինի «Օշական» մասնաճիւղի «Սիփան» պարախումբը, մեծ տպաւորութիւն ձգելով Խորհրդաժողովին մասնակից երկիրներու ներկայացուցիչներուն եւ օտար ու Կիպրացի հրաւիրեալներուն մօտ:

Հինգշաբթի, 11 Ապրիլ 2013-ի յետմիջօրէին, Պետական

Ներկայացուցիչը եւ Տիկինը, ներկայ գտնուեցան Կաթողիկէ համայնքի Ս. Խաչ եկեղեցւոյ մէջ մատուցուած եկեղեցական արարողութեան, ի պատիւ նորընտրեալ Ֆրանչիսկո Ա. Պապի, որու յաջորդեց հիւրասիրութիւն:

Նոյն օրը երեկոյեան, Տէր եւ Տիկին Վարդգէս Մահտեսեաններ ներկայ գտնուեցան Զնդկաստանի դեսպանատան մէջ տեղի ունեցած հիւրասիրութեան, Զնդկաստանի Արտաքին Գործոց Նախարարին Կիպրոս այցելութեան առիթով:

Ուրբաթ, 12 Ապրիլ 2013-ին, Պետական Ներկայացուցիչը եւ տիկինը, յատկապէս հրաւիրուելով, ներկայ գտնուեցան Կիպրոսի Սիմֆոնիք նուագախումբին եւ Գալայճեան Զինմարկին կազմակերպած «Չայկան եւ Իտալական Երաժշտական Երեկոյ»ին, որ տեղի ունեցաւ Ստրովոլոսի Քաղաքապետարանի սրահին մէջ: Այս միջոցառումը կը վայելէր հայրենի վաստակաւոր խմբավար Պրն. Վարդան Յակոբեանի, սփրանօ Տիկին Սոնա Կարկալոյեանի եւ պարիթոն Ալեքս Մոսկոֆեանի մասնակցութիւնը: Ելոյթի վերջաւորութեան, Պրն. Մահտեսեան անձամբ շնորհաւորեց զանոնք:

Շաբաթ, 13 Ապրիլ 2013-ին, Պրն. Մահտեսեան հրաւիրեցաւ մասնակցելու Thoukidides Զետազօտական Կեդրոնի կազմակերպած միօրեայ համաժողովին՝ «Տիլեման եւ ընտրութիւններ յաջորդ օրուայ համար» նիւթով, որ տեղի ունեցաւ Ստրովոլոսի Քաղաքապետարանին մէջ:

Նոյն օրը երեկոյեան, Տէր եւ Տիկին Վարդգէս Մահտեսեաններ, յատկապէս հրաւիրուելով, ներկայ գտնուեցան Տիկին Մակի Զալաճեան-Էսփիճեանի «Ծիածանի Զետքերով» գիրքի զինեձօնին, որ տեղի ունեցաւ Ազգային Առաջնորդարանի «Վ. Իւթիւճեան» սրահին մէջ: Գիրքը ներկայացուց Զամբիկ Մարտիրոսեան: Այս հրատարակութեան ուրախ առիթով, Պրն. Մահտեսեան շնորհաւորագիր մը յղեց

գիրքի հեղինակին, գնահատելով անոր աշխատութիւնը:

Շաբաթ, 20 Ապրիլ 2013-ին, Պետական Ներկայացուցիչը եւ տիկինը, յատուկ հրաւեր ստանալով, ներկայ գրտնուեցան «Երաժշտական երեկոյ՝ նուիրուած ճիւլիէթա Մովսիսեանի յիշատակին» ելոյթին, որ տեղի ունեցաւ Քասթլիոտիսսա սրահին մէջ, մասնակցութեամբ սփրանո Ջարա Բարխուդարեանի, դաշնակի ընկերակցութեամբ Նարա Գեորգեան-Դանիէլեանի, ինչպէս նաեւ Գոռ Մելեանի եւ Մարիոս Անտրեուի:

Ուրբաթ, 10 Մայիս 2013-ին, Պրն. Վարդգէ Մահտեսեան, յատկապէս հրաւիրուելով, ներկայ գտնուեցաւ «Արարատ»ի եւ «Օմնիա»ի միջեւ տեղի ունեցած ֆութսալի աւարտական մրցումին:

Ուրբաթ, 17 Մայիս 2013-ին, Տէր եւ Տիկին Վարդգէ Մահտեսեաններ, ներկայ գտնուեցան Կիպրոսի Հայ Աւետարանական եկեղեցւոյ կազմակերպած «Սարդարապատով վերածնուած հայրենիք» միջոցառումին, որ տեղի ունեցաւ Առաջնորդարանի «Վ. Իւթիւճեան» սրահին մէջ, հովանաւորութեամբ Գերշ. Տէր Վարուժան Արքեպիսկոպոս Հերկելեանի եւ նախագահութեամբ Պետական Ներկայացուցիչի: Օրուան խորհուրդը ներկայացուց Պրն. Միհրան ճիզմէճեան, իսկ գեղարուեստական բաժինով հանդէս եկաւ ասմունքող Տիկին Իրմա Գապաքեան-Տէտէեան:

Չորեքշաբթի, 22 Մայիս 2013-ին, Պետական Ներկայացուցիչը ու Տիկինը, ներկայ գտնուեցան Կիպրոսի Հայ Դատի կազմակերպած «Կիլիկիոյ եւ Արեւմտահայաստանի մասին» տեսա-լսողական երեկոյին, որ տեղի ունեցաւ Առաջնորդարանի «Վ. Իւթիւճեան» սրահին մէջ: Օրուան պատգամաբերն էր Տիկին Լինտա Այնթապլեան:

Չորեքշաբթի, 29 Մայիս 2013-ին, Պրն. Վարդգէ Մահտեսեան ներկայ գտնուեցաւ Ակրոպոլիս Փարքին մէջ տեղի ունեցած «Խաղաղ Գոյակցութիւն» թեմայով մշակու-

թային միջոցառումին, նախաձեռնութեամբ ՄԱԿ-ի անդամ կազմակերպութիւններու, որու ընթացքին իր մասնակցութիւնը բերաւ Համազգայինի «Սիփան» Պարախումբը:

Շաբաթ, 1 Յունիս 2013-ին, Տէր եւ Տիկին Վարդգէս Մահտեսեաններ, յատկապէս հրաւիրուելով, ներկայ գրտնուեցան ՀՀԴ Կիպրոսի Կոմիտէի եւ յարակից միութիւններուն կազմակերպած Հայաստանի Ա. Հանրապետութեան 95-ամեակի հանդիսութեան, որ տեղի ունեցաւ Նիկոսիոյ Նարեկ Վարժարանի սրահին մէջ: Օրուան բանախօսն էր Պրն. Սիմոն Այնէճեան:

**Պաշտօնական մակարդակի
հանդիպումներ եւ ձեռնարկներ**

Չորեքշաբթի, 10 Ապրիլ 2013-ի առաւօտեան, Պրն. Վարդգէս Մահտեսեան տեսակցութիւն մը ունեցաւ Ստրովոլոսի Քաղաքապետ Դոկտ. Լազարոս Սավիտիսին հետ, քննելու Կիպրահայ համայնքին հետ առնչութիւն ունեցող



կարգ մը հարցեր: Այս առիթով, ան իր ու Կիպրահայ համայնքին անունով արձանագրութիւն մը ձգեց Քաղաքապետարանի յուշամատեանին մէջ:

Նոյն օրը, Պետական Ներկայացուցիչը, իր խորհրդարանի գրասենեակին մէջ, ժանօթացման հանդիպումներ ունեցաւ Տանըմարքայի դեսպան Տիկին Քրիստէն Կիլանի, Ֆինլանտայի դեսպան Տիկին Անիու Սաարէլայի եւ Շուէտի դեսպան Պրն. Կլաս Կիէրոյի հետ:

Հինգշաբթի, 25 Ապրիլ 2013-ին, Կիպրոսի Մարոնիթ, Հայ եւ Լատին համայնքներու ներկայացուցիչները, հանդիպում մը ունեցան Փոքրամասնութիւններու Հարցերու Յանձնակատար Տիկին Քէթի Քլիրիտուիի հետ, երեք համայնքները յուզող զանազան խնդիրներու կապակցութեամբ:

Երկուշաբթի, 29 Ապրիլ 2013-ին, Պետական Ներկայացուցիչը եւ Թեմական Ժողովի Ատենապետ Պրն. Սեպուհ Դաւիթեան, հանդիպում մը ունեցան Միացեալ Նահանգներու Դեսպան Ն.Վ. Պրն. ճոն Քէօնիկի հետ, Կիպրոսի գրաւեալ շրջանի հայապատկան եկեղեցական համալիրին հարցով:

Հինգշաբթի, 23 Մայիս 2013-ին, երեք Կրօնական Փոքրամասնութիւններու ներկայացուցիչները տեսակցութիւն մը ունեցան Օրէնքի Յանձնակատար Տիկին Լիտա Քուրսունայի հետ, քննելու Շրջանային կամ Փոքրամասնութիւններու Լեզուներու Եւրոպական Հիմնաթուղթի (European Charter for Regional or Minority Languages) տեղեկագիրը:

Ուրբաթ, 24 Մայիս 2013-ին, Պետական Ներկայացուցիչը ժանօթացման հանդիպում մը ունեցաւ Սլովաքիոյ նորանշանակ դեսպան Տիկին Օսկանա Թոմովայի հետ:

Երեքշաբթի, 4 Յունիս 2013-ին, Պրն. Վարդգէս Մահտեսեան հանդիպում մը ունեցաւ Ներքին Գործոց Նախարար

Պրն. Սուկրատիս Խասիկոսի հետ, քննելու Կիպրոսի դիմագրաված դժուար տնտեսական պայմաններու լոյսին տակ Կիպրոս բնակութիւն հաստատած օտարահպատակ հայերուն հարցերը:



Ուրբաթ, 21 Յունիս 2013-ին, Պետական Ներկայացուցիչը տեսակցութիւն մը ունեցաւ Կրթութեան եւ Մշակոյթի Նախարար Պրն. Կիրիակոս Կէնէվէզոսի հետ, գաղափարներ փոխանակելու կրթական ոլորտէն ներս հայ համայնքը յուզող խնդիրներու շուրջ:

Չորեքշաբթի, 26 Յունիս 2013ին, Պրն. Վարդգէս Մահտեսեան լրացուցիչ հանդիպում մը ունեցաւ Ներքին Գործոց Նախարարութեան Ընդհանուր Տնօրէն Պրն. Անտրէաս Աշիտիսի հետ, Կիպրոս բնակութիւն հաստատած հայ օտարահպատակներուն հարցերուն գծով:

Ջօրակոչիկներու հանդիպում

Ուրբաթ, 28 Յունիս 2013-ի երեկոյեան, Պետական Ներկայացուցիչի Գրասենեակ ներկայացան 2012-2013-ի բանակի ծառայութեան թեկնածուները, ընկերակցութեամբ կարգ մը ծնողներու: Պրն. Մահտեսեան խօսք առնելով, լայն կէտերու մէջ փոխանցեց բանակի ծառայութեան դրական կողմերը եւ յորդորեց անոնց համակերպիլ աւագ զինուորական պատասխանատուներու ցուցմունքներուն: Ան նաեւ հաստատեց իր պատրաստակամութիւնը անոնց կողքին կանգնելու՝ տրամաբանական դժուարութիւններու պարագային:

Շնորհաւորագիր

Հինգշաբթի, 4 Ապրիլ 2013-ին, Պրն. Մահտեսեան նամակ մը յղելով շնորհաւորեց Տիկին Ձետա Էմիլիանիտուն, Աշխատանքի եւ Ընկերային Ապահովագրութեան Նախարար նշանակուելուն ուրախ առիթով:

Ուրբաթ, 19 Ապրիլ 2013-ին, Պետական ներկայացուցիչը անջատ գիրերով, շնորհաւորեց Կիպրոսի Հանրապետութեան մօտ Լիբանանի նորանշանակ Դեսպան Դոկտ. Եուսէֆ Սատաքան եւ Սլովաքիոյ նորանշանակ Դեսպան Տիկին Օսքանա Թոմովան:

Երկուշաբթի, 13 Մայիս 2013-ին, Պրն. Վարդգէս Մահտեսեան նամակով մը շնորհաւորեց Համազգայինի Կիպրոսի «Օշական» Մասնաճիւղի վարչութեան տարած տըքնաջան աշխատանքը, որ դրսեւորուեցաւ «Սիփան» պարախումբի բացառիկ ելոյթով, մաղթելով յարատեւութիւն մշակութային իրենց առաքելութեան մէջ:

Նոյն օրը, Պետական ներկայացուցիչը նամակ մը յանձնելով շնորհաւորեց «Սիփան» եւ «Նամօր» պարախումբերու հայրենի պարուսոյց եւ գեղարուեստական ղեկավար Պրն. Պետրոս Ղարիպեանը, իր տարած բժախնդիր աշխատանքին համար, որ պսակուեցաւ աննախընթաց յաջողութեամբ:

Չորեքշաբթի, 5 Յունիս 2013-ին, Պրն. Վարդգէս Մահտեսեան շնորհաւորագիր մը յղեց Կիպրոսի Հայոց Թեմի Կաթողիկոսական Փոխանորդ Գերշ. Տէր Վարուժան Արք. Հերկելեանին, «Արծիւ» ամսաթերթի 20-ամեակին եւ «Գառնի» մատենաշարի 25-ամեակին ուրախ առիթներով, մաղթելով երկարամեայ գործունեութիւն եւ հրատարակութիւններու շարունակականութիւն՝ ի նպաստ Հայ գիրի ու գրականութեան տարածման:

Գեղարուեստական Երեկոյ

Միայն մէկ ելոյթ

«Ժողովրդական Երգիչ» Համոյթ

Շաբաթ, 9 Նոյեմբեր 2013, ժամը 19:00-ին
Ստրովուլուսի Քաղաքապետարանի Սրահ
Նիկոսիա

Մասնակցութեամբ՝
Հայրենի «Ժողովրդական Երգիչ» նախագիծի
Լաւագոյն երգիչներուն եւ նուագախումբին

Ինչպէս նաեւ
Համազգայինի «Սիփան» պարախումբին

«Ծանօթանանք Կիպրոսի Հանրապետութեան
Օրէնքներուն» բաժինը լոյս պիտի տեսնէ «Լրատու»ի
յաջորդ թիւով, չճանրաբեռնելու համար մեր ընթերցողները:

ՈՒՇԱԴՐՈՒԹԻՒՆ

Ամառուայ արձակուրդի շրջանին,
 Երեսփոխանական Գրասենեակը
 փակ պիտի մնայ
 Երկուշաբթի, 12 Օգոստոսին
 մինչեւ
 Կիրակի, 1 Սեպտեմբեր 2013-ը:

ԿԻՊՐԱՅԱՅ ՀԱՄԱՅՆՔԻ ՊԵՏԱԿԱՆ ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ

Քաղաքական Գրասենեակ

9B & C Kastorias Street, Ayia Paraskevi, 2002 Strovolos
 Հեռախոս 22- 45 45 40, Հեռատիպ 22- 42 46 42
 Ել. Հասցե office@armenianmp.com
 Ոստայնէջ՝ <http://www.armenianmp.com>

Խորհրդարանական Գրասենեակ

Office Δ-2-2, House of Representatives, 1402 Nicosia
 Հեռախոս 22- 40 72 02, Հեռատիպ 22- 40 74 42
 Ել. Հասցե vmahdessian@parliament.cy